

124.

गाटुल युस छुय त्रुकुय सु आसान ।  
बासिय योद मूड सुय ज्ञानुवान ॥  
अकि अकि ग्वण चारान मंज सासन ।  
जन्म रथि खँसिथुय लबान न्यर्वान ॥

125.

हरे कृष्ण सतवरु आगुर च्च म्योनुय ।  
गागुर च्चै लोलुच बँरुथ क्याह जान ॥  
मनुक सागर वुज्जुनोवुथ प्रोनुय ।  
अकि जेरि कँडथो अमर्यतु कान ॥

126.

मनुचे त्रेशनायि नो अंत आसान ।  
वुछ वुछ तु बूज्य् बूज्य् बडान छय ॥  
गंड कर रुमु रजि युथ मन मानि आना ।  
ज्ञानु व्यचार सुत्य् करतन लय ॥

127.

मनस भूगन हंज आहुती दिवान ।  
 जन्मादि जन्म गँधियो हुमान ॥  
 कम कर हुमुनुय तँम्य् सुंजुय कनुवान।  
 अँथ्य् मनुसुय मंज वुछुन भगवान ॥

128.

कन थव सत कथुनुय सथ वरताव ।  
 वथ अथि यिथ वुछिहन पानु सुय ॥  
 सन पूर मनुकुय नागुय वुजुनाव ।  
 छाय गँलिथुय छुय ननि वानु सुय ॥

129.

सत् ग्वरन वथ मे हॉवुम ।  
 प्रथ मे कौडुम कामुसुय ॥  
 सुबु शामय याद पोवुम ।  
 लथ लॉयिथ आरामुसुय ॥

130.

नाना रूपव वुछमख साहिबो ।  
कुनुय प्राण सॉरिसुय मंज ॥  
पंच भूतव सुत्य् ख्यवान दाना ।  
बहाना भवुसरु तारुनुकुय संज ॥

131.

च्युय अँगुन पवन आकाश ।  
प्रकाश गगन तु भूतल च्युय ॥  
रज तम सतकुय छुख प्रकाश ।  
ज्ञानुक गाश मनि वुजनाव च्युय ॥

132.

कोत गछान बब मॉज बांधव सॉरी ।  
शुन्याहस मीलिथ शुन्य् सपदान ॥  
रोज्जुवुन नो येति केंह संसॉरी ।  
प्राण चूर रठ पतु लारी नु स्वान ॥

133.

क्रूर कर्मन हुंद गोब बोरुय च़ेय ।  
डखि रूज़िथ नखु वोलुथ सोर ॥  
अदु च़ेय निश वॉच़ुस बावु सानुय ।  
रँछिथस मुच़रुथ भँक्ती तोर ॥

134.

मंगनु निशि रछतम जानानो ।  
जन्मस यिथ बस मोंगुमख च़ुय ॥  
प्राणन मंज़ बाग दोरुम ध्यानो ।  
मरुन जानुय मंगनु निशि छुय ॥

135.

लोलुकि सबकय लगख नो शाठस ।  
गाठस वातख पानय च़ुय ॥  
पम्पोश फ़वलनय दँद्यमुतिस काठस ।  
पाठस पँज़िस नो छु कांह पाठुय ॥

136.

पानय सिरियुक प्रचंड तापवान ।  
 सुगंद पृथ्वी हुंद छुख चय ॥  
 औशादियन पूरि पूर बनावान ।  
 रसु रूपु चंद्रम बरुसान चय ॥

137.

कति छांडथ बुय ल्वति ल्वति हावुम ।  
 कति नुय आसान छुय चोन दार ॥  
 मनु मंजलिस जीर दिनुसुय थावुम ।  
 नखु वालुम गोब पापुन बार ॥

138.

हा जीवु मतु रोजतु प्रथ काँसि मंगान ।  
 नंग रछ नंगन तु सत् संग कर ॥  
 रछी सु पानय मूलन तु लंगन ।  
 मंगुन मंगुन त्राव जिंदय च मर ॥

139.

जाग्रत सोपुन सुशपति तूर्या ।  
अवस्तायि चोर यूगियन हंजु छय ॥  
अभिमान दीहुक थावुन छु मिथ्या ।  
सुलि प्रजनावुन गछतस लय ॥

140.

शुनी ओसुख शुनी आसख ।  
शुनी रोजान छुय पतुवथ ।  
शुन्यस मंजुय क्याहताम लबख ।  
शुन्युक सॉमी छुय अख सथ ॥

141.

च्यथ तय चीतन कुनुय कॅरिथ ।  
चु तु बु कासतो पानस चुय ॥  
परमानन्दस पानुय वॅरिथ ।  
म्युल तस सुत्य् गछि गलियो दुय ॥

142.

दिहिकुय गरु तस क्युत थव नाँविथ ।  
 पाँविथ थावुख शॉत्रुय चोर ॥  
 इंद्रेयि म्वखतय तथ जरुनाँविथ ।  
 छॉविथ गछ़ख अवस्थायि चोर ॥

143.

पनुनुय पान प्रज़नाँविथ मु आसुय ।  
 ग्रासुय सर्व संकल्पन च़ु कर ॥  
 त्राव सॉरी तलु प्यठु तलुवासुय ।  
 सत् संगुकुय व्वपुवासुय कर ॥

144.

योदवय मन गछ़ि ब्रह्म व्यचारस ।  
 गरि बिहिथुय करख यात्रा च़ुय ॥  
 प्रदिक्षण पानय गछ़ि आचारस ।  
 प्रचारस केंह नो करुनुय छुय ॥

145.

संसौर्य यशकी नशिनय वोलनख ।  
 नेषकाम जामु कोनु छुख पौरान ॥  
 मोह नंदरे येति वारय वोलनख ।  
 च्यतु फुरनाह कोनु बेहेनावान ॥

146.

नजरन मंज नजरि सृत्य गाह त्रॉविथ ।  
 कॅस्थि ऑब गॉब मनि प्रज़ल्योख च़ुय ॥  
 नावुक म्वखतय वावु दावि तॉस्थि ।  
 खॉरथस ह्योर येमि सँदरय बुय ॥

147.

ओरय पानय तोरुय त्रोवुथ ।  
 सोरुय बोवुथ तु होवुथ च़ेय ॥  
 व्वच़ार दोवुथ मनुय सोवुथ ।  
 फ़ोलुरोवुथ पोश छोवुथ च़ेय ॥

148.

नाकारु कुस छुय कुस छुय जानुय ।  
 अंगुय ब्योन थव क्व संगु निश ॥  
 सत् संगु सुती रंग द्यू जामय ।  
 मव मंगुय छुय पानस निश ॥

149.

छ्योट श्रूच कॅरिथुय कुन नो वातख ।  
 लबख नो कुनि अपारुक पार ॥  
 श्रोच्च्युक श्रूचुय च कुनुय आसख ।  
 सबक यी मनि छुय सार्युक सार ॥

150.

जॉविजि रज़ि थपि तार द्यू पानस ।  
 दानु दानस ख्यनु वॉल्य् सुंद नाव ॥  
 ख्यावान सुय मव गछ्छ अभिमानस ।  
 वातख थानस बडियो बाव ॥

151.

तस रोस केंह मतु स्वरतो जीवो ।  
पर तो नेष्काम तँम्य् सुंद नाव ॥  
सुय ज़ॉनिथ कर प्रथ काँसि सीवो ।  
न्यवानु पद अविनाँशी प्राव ॥

152.

अंतः श्वद कॅरिथ्रिय सोम वरुन ।  
संतोषि तम कड ऊँ रठ प्राण ॥  
गम्भीरतायि शाह वालुन तु खारुन ।  
गली शक वुछख सारिनुय कुन प्राण॥

153.

विकल्पुय बोज़ छुय भ्रमुरावान ।  
संकल्प द्रड करतु रठ मन प्राण ॥  
ध्यानय कॅरिथ्रिय लोत त्राव अपान ।  
द्वन बुमुनुय मंज़ प्रकाशिच कान ॥

154.

कथ छुख बोज़ान इंद्रियि छ्वने ।  
त्रुकुय वनिय चीतन रोज़ ॥  
सनिरस रोज़ान छुय मंज़ मने ।  
गने शब्दुक च़ ठने बोज़ ॥

155.

हा पानु सूर गछ़ान नूरु तने ।  
खन हनि हने दयि सुंद नाव ॥  
नने तस युस मनय सने ।  
सौरूप बने बडियो बाव ॥

156.

ऑखरस प्यवान छय तस कने ।  
अने अँछ युस थवान संसार ॥  
मव कर मँखुर व्वन्य् निशि रने ।  
कर धन्य धने लबखो सार ॥

157.

हा साहिबो चय मुचरिथ तौर्य ।  
 नखु वॅथ्य् बौर्य यिम ऑसिम लौर्य ॥  
 यस साहिबो चय छुख करान यौर्य ।  
 तॅमिसुय शॅमिथुय वॅच गॅयि सौर्य ॥

158.

मायायि सुत्य् बनान ज़ीव छि शौर्य ।  
 ज़ानान बुय छुस वनान छिय चौर्य ॥  
 यस वातान येमि विज़ि छय वौर्य ।  
 सु गळान संसारु मंज़ु हौर्य हौर्य ॥

159.

ज़ीवो ड्यकु डून्य् क्याज़ि फुटुरावान ।  
 असमॉन्य् गाडु छुख बुज्य् बुज्य् ख्यवान ॥  
 कालुनि चंजे दिह येलि प्यवान ।  
 कुस मूद कुस रूद बन व्यचारुवान ॥

160.

सत् ग्वरु चरणन नाव बनाविथ ।  
 शब्दुकि फिहिकुय दिवान गछ ज़ोर ॥  
 चरणन परमय दामुय सपदिथ ।  
 प्रॉविथ गछख अवस्थायि चोर ॥

161.

कनुवुय बूज़िथ मनुसुय सनतो ।  
 वनतो क्याज़ि गॅयी डुल्य् ब्रॉर ॥  
 नावु ट्वंगरे सुत्य् वावु डरू खनतो ।  
 बनतो पूरु श्वदि इंद्रेयि नॉर ॥

162.

काल छुय अँद्य अँद्य गरि गरि फेरान ।  
 कुनि विज़ि दिग दिथ नियी संसार ॥  
 भ्रमु संसारु मंज़ु नेरतो च़ु दोरान ।  
 च़ठ ज़ॉव्युल ज़ाल लबखो सार ॥

163.

युस नमि चाने अथ पादु जोरि ।  
अदु मो पोरि तस यम तय काल ॥  
तस त्रन भवनन मंजु नो सोरि ।  
गलुनस भ्रम तय छ्यनुनस जाल ॥

164.

संकल्प शुन्य् कॅरिथ्युय सुय गारुन ।  
मारुन्य् प्रेयमु सॅदरस मंजु छाल ॥  
कीवल ऑसिथ कीवल छारुन ।  
तारुवुन शाह तस रोजु नॉली नाल ॥

165.

मनु आसुनस च्युय पम्पोश वथुराव ।  
शंखु नादय सुत्य् लायुस नाद ॥  
सूहम शब्दय उद्धगीत बोजुनाव ।  
शांत लय गॅछिथ्युय सपदखु शाद ॥

166.

अनुवॉर्य मीलिथ सरु कर संसार ।  
 मरु मरु चलि वुछ पनुन्य् असरार ॥  
 थर कौसिथ नोन कड़ पज़ि कुय सार ।  
 शर नेरि सुम दिथ लगियो तार ॥

167.

दयि बतु शूरथम बावय पॅहरॉच ।  
 भवु श्वहरॅच निशि रॅछिथस बुय ॥  
 लीलु रॉचन येति बनहहॉन दुहु रॉच ।  
 योद आरॅच शरण आसिहेनु चैय ॥

168.

कम कम ग्रेंड्य वुछ पॅथरिस लारान ।  
 सारान पोत कर्मन हुंघ बॉर्य ॥  
 कॅह रूद्य् कॅह मूद्य कॅहन छु तारान ।  
 प्रारान कॅहन गॅयि जन्मुय सॉर्य ॥

169.

दारि दरवाजु इन्द्रेयि यथ पानस ।  
 प्रथ जानस मंज सुमरथ सुय ॥  
 कर बंद अँदरी सँदराव दानस ।  
 आँनस खय गलि ननि वानु छुय ॥

170.

हा ग्वरु कति छांडथ लबथ कति ।  
 मति रॉच सारेय डाँक्य् गँयि मेय ॥  
 सुमरनि चानि वॉचस असलुचि वति ।  
 स्वति स्वति दीदार होवथम च़ेय ॥

171.

प्राणस अपानस कुनुय कँरिथ ।  
 वारु वारु दम द्यू मंज पानस ॥  
 संकल्प सॉरी शोमरॉविथ ।  
 मनुसुय प्रजलाव जानानस ॥

172.

योद पोथि परख तु पूजा करख ।  
 तीर्थन फीरिथ गालख पान ॥  
 बावु रोस जपय पानस फरख ।  
 तरख नो भवुसरु लबख नो स्थान ॥

173.

शोयव थावुम काँर मूरिथ ।  
 तंबुलॉविथ हाँवुहम पोशि वॉर ॥  
 पोज जॉनिथ शाह गँयम रॉविथ ।  
 कलु छाँविथ मलनुय डुलु बाँर ॥

174.

पजि अपजे यिम दोह रावु रॉविम ।  
 प्यादन राजय बनोवुम पान ॥  
 क्वकर्यनुय येति म्वखतु छोकुम ।  
 मनि रावुरॉवुम खँचुम हान ॥

175.

हमसू करान मनि मंज छोंडुम ।  
 नॅन्य अदु मेय वॅनिनम कॅन्य कथ ॥  
 अॅन्य ज्ञानुक धन्य् मै प्रोवुम ।  
 सार बोवुम मेय पतुवथ ॥

176.

हख दिशुय च्वपॉर्य वौनुम ।  
 क्रख च्चु म्यॉनी बोजतो ॥  
 कॅंह ति नो रोजी यि अपजुय ।  
 प्रेयम बावय च्चु रोजतो ॥

177.

अन्तु रोस विषयव कोताह वौलहख ।  
 दौलहख दानि ज़न कंजसुय मंज ॥  
 तिलु वॉन्य दांदु सुंघ् प्रदिक्षण दोवहख।  
 मौचुरोवहख सुह शालु सुंद क्रंज ॥

178.

ज्ञानी ग्यानुकि बजरय छि लवान ।  
तोतु सुंज रट केहं छिय लगावान ॥  
वुन्य् वुन्य् हॉरिथि कुन नो वातान ।  
प्रेयमु थॅन्य् बनि किथु तॅथ्य् थव ध्यान॥

179.

क्रूधस ह्युव नो कांह शैथरुय छुय ।  
कंजे रचि रचि खून ज़ालान ॥  
ज़ीवस पॉर्यज़ान मॅशारावान छुय ।  
व्वज़ु भ्रमसुय मंज छुय त्रावान ॥

180.

हाज़ीव स्थूल दिह नो छुख च़ुय ।  
नो सूक्षम छुख आसुवुन च़ुय ॥  
आसुवुन छुख दृष्ट आत्मा च़ुय ।  
आमुत मृत्य् लूकस यि ज़ानुनि च़ुय ॥

181.

बावु लोलु सुती प्रुछ सथ ग्वरस ।  
 छुम क्याह करुन तु किथु तरु बो ॥  
 पान पुशारोविथ सुमरण करतस ।  
 पछ योद थावख तु तरख हो ॥

182.

काँसि हुंद आह मतु ह्यतो ज़ीवो ।  
 आह गॅरीबु सुंद चाह छु करान ॥  
 ब्योन रूजिथ कर प्रथ काँसि सीवो ।  
 शाह बॅनिथुय प्रावख निर्वान ॥

183.

सुय बिहिथ मंज नॉभिस्थानस ।  
 हृदयि स्थानस मंज छुय सुय ॥  
 बॅल्य् छुख गोमुत च़ुय अभिमानस ।  
 अद्यात्मु ज्ञानस च़ेनतो च़ुय ॥